

## Terenga 5: Hōtaka 12 – ‘Kāore anō...kia/i...’

### He Mihi

Nau mai anō rā, e kare mā, ki tā tātau kaupapa, ki Ako. Tēnā, kia takinoho tātau ki te tākeke i te kupenga o te reo hei tuku mā tātau ki te moana o te reo e māwhai mai ana, me kore e hao i a tātau ētahi kōrero hei poumatua mā tātau, mā te hunga e pīkoko atu nei ki te reo wainene, ki te reo mōkarakara o nehe mā.

### Hei Mahi Whakarongo

He tīpakonga e whai ake nei i tangohia i te hōtaka o Whakataukī. Ko te kaikōrero, ko tētehi o aku hoa whakaako i te reo i Te Whare Wānanga o Waikato, ko Te Kāhoutu Maxwell.

### Anei ngā pātai hei whakautu mā koutou:

- 1) Nō wai te moemoeā?
- 2) He aha te kupu whakaari?
- 3) He aha tētehi o ngā āhuatanga i whakatauritehia ai e Te Matua Tangata?

Kia whakarongo ake tātou ki tēnei uri o Tūtāmure.

### He Whakamārama

E rua ngā pū ka whai i ngā kupu ‘Kāore anō’ hei hono i te tāhu, i te kaimahi rānei ki te mahi. Tirohia ngā tauira e rua e whai ake nei:


- Kāore anō te moa kia kitea i tēnei motu.
- Kāore anō te moa i kitea i tēnei motu.

E ai ki ētehi kaiweteoro, he rite tonu te tikanga o ēnei rerenga o mua ake nei. Heoi, tirohia ēnei whakapākehātanga o ngā tauira e rua o mua, kia kitea ai tētehi paku rerekētanga ā-wā nei.

- Kāore anō te moa kia kitea i tēnei motu. *The moa hasn't yet been seen in this land. (wā heke)*
- Kāore anō te moa i kitea i tēnei motu. *The moa hadn't yet been seen in this land. (wā hipa)*

### He Mahi Ī-papa

Whakamāoritia te rerenga kōrero.



### Hei Mahi

Whakamāoritia ēnei rerenga e whai ake nei:

1. I haven't seen a coat like that.
2. The letter hadn't arrived when I left this morning.
3. The matter hasn't been resolved.
4. The food wasn't quite cooked at 12 o'clock.

### Whakautu:

Mahi Ī-papa: Kāore anō ia i tae atu i taku taenga atu.

1. Kāore anō au kia kite i tētahi koti pērā.
2. Kāore anō i tae mai te reta i taku wehenga i te ata nei.
3. Kāore anō te take kia tatū.
4. Kāore anō te kai i maou i te tekau mā rua karaka.